

Aruba, Boneiro y Corsou ta firma acuerdo di cooperacion pa desaroyo di Papiamento

(Curacao.nu) – Dialuna mainta na Oranjestad, a firma un acuerdo di cooperacion entre Aruba, Bonaire, y Corsou dirigi riba desaroyo y promocion conhunto di idioma Papiamento. E acuerdo ta marca un paso importante den agrupacion di conocimiento y recurso nan riba tereno di educacion, desaroyo di idioma

y profesionalisacion di maestro.

E Minister di Enseñansa a firma den nomber di Aruba; comisario Nina den Heyer na nomber di Boneiro; y e minister di Enseñansa, Ciencia, Cultura y Deporte na nomber di Corsou. Cu e firmamento aki, e partidonan ta subraya e importancia di Papiamento como un factor

unificador entre e tres islanan, a pesar di e diferencianan den ortografia y funcion di idioma riba cada isla.

E acuerdo ta percura pa colaboracion den areanan manera material di enseñansa, traduccion, examen, y formacion di maestro. Un grupo di trabou conhunto lo desaroya un programa di trabou dentro di algun luna.



Consehero di impuesto Hulandes aresta pa servicio di inmigracion Mericano ICE

(NLTimes) – E consehero di impuesto Hulandes Frank Butselaar, conoci como e “fiscal di e streaman,” a keda aresta pa agencia di inmigracion ICE dialuna, inmediatamente despues di a completa un castigo di prizon na Connecticut pa fraude di impuesto.

Butselaar, kende a traha cu clientenan Hulandes prominente incluyendo e presentador di television Linda de Mol, presentador Jort Kelder, modelo Yfke Sturm, y DJnan internacionalmente conoci Afrojack y Tiësto, a ser deteni na Merca pa motibo di un declaracion di impuesto falso entrega na nomber di DJ Afrojack, kende su nomber real ta Nick van de Wall.



Na februari, un corte di Merca a sentencia Butselaar na 30 luna di prizon pa e ofensa. Ya caba el a pasa 21 luna den detencion, prome na Italia y despues na Merca, loke a nifica cu e mester a sinta apenas algun luna adicional. Su liberacion dialuna for di e prizon federal di Danbury na

Connecticut segun informe tabata basa riba “bon comportacion” y otro factornan cu a reduci su castigo.

Sinembargo, asina cu el a sali for di e facilidad, oficialnan di ICE tabata wardando pa deten’e. Segun FD, door cu Butselaar a ser extradita for di Italia pa enfrenta acusa-

cionnan na Merca, e tabata ser considera di no tin status di inmigracion valido despues di a completa su sentencia.

E abogadonan Mericano di Butselaar a purba di yega na oficialnan di ICE via telefon pa aclara cu nan cliente tabatin intencion di bandona e pais mesora. Ya caba el a cumpra pasashi di avion pa un vuelo di regreso pa Hulanda dialuna marduga.

No ta cla kico lo pasa cu Butselaar awor. Un amigo cu tabata presente na e prizon a bisa cu el a keda simplemente informa, “E no ta bay cas awe.”

Facilidad di ICE ta opera centronan di detencion pa individuonan cu ta ser considera

di ta na Merca ilegalmente. Si autoridad di inmigracion determina cu un persona no tin status huridico, nan ta regla deportacion.

E aresto ta bini meymey di e aplicacion di politica estricto di inmigracion pa presidente di Merca Donald Trump. Trump a priminti di kita miyones di inmigrante indocumenta y a dirigi e Cas Blanco pa garantisca cu ICE ta realiza por lo menos 3.000 detencion diariamente pa cumpli cu su metanan di deportacion.

Ademas di su condenacion Mericano, Butselaar tambe ta pendiente di un investigacion Hulandes pa supuesto fraude fiscal cometi na Hulanda.

Minister Hulandes ta bisa cu acuerdo di EU cu Israel ta permiti yudansa drenta Gaza; Egipto ta bisa cu no

(NLTimes) – Minister demisionario Caspar Veldkamp di Asunto Exterior ta bisa cu un acuerdo di Union Europeo (EU) cu Israel a resulta den 180 truck cu yudansa di emergencia drentando Gaza dialuna. Egipto a bisa dialuna cu e acuerdo di Israel cu EU no a resulta ainda den ningun ayudo humanitario adicional pa e Palestinonan den e enclave asedia pa Israel.

Veldkamp y varios funcionario halto di EU a bisa cu un acuerdo cu Israel a resulta caba den mas truck cu cuminda pa Gaza. Pero e minister demisionario Hulandes ta e prome pa pone un cifra na e demanda, aunke no ta cla riba kico e ta basa esaki. “Mi ta mira cu 180 truck a bay ayera y 160 e dia prome,” Veld-



kamp a bisa periodistanan na Bruselas ayera mainta.

El a enfatisa cu e trucknan aki ta leu di ta suficiente pa alivia e crisis humanitario na Gaza causa pa e atakenan continuo di Israel y e restriccion di yudansa di emergencia. “Pero mi ta mira awor cu, door di actua conhuntamente como EU, nos a logra cierto movicion den e posicion di Israel,” Veldkamp a bisa.

A pidi Nacion Uni pa confirmacion di si realmente mas yudansa di emergencia ta drentando e Franha di Gaza, pero te ainda no a ricibi un contesta.

Ayudo pa Gaza ta bay pa gran parti pa Egipto. “Nada no a cambia riba tereno ainda,” e minister di Asunto Exterior di Egipto, Badr Abdelatty, a bisa dialuna, contradiciendo e narativo di Brusel.

E accionnan di Israel na Gaza ta viola e acuerdo comercial entre EU y Israel, hefe di politica exterior di EU Kaja Kallas, a conclui recientemente den un rapport. Awe, e ministernan di Asunto Exterior di EU lo dicidi si Union Europeo lo actua contra Israel.

Segun NOS, un grupo di abogado lo presenta un demanda contra e Comision Europeo y Kallas na Corte Europeo di Husticia diahuebs. Nan ta acusa Bruselas di a fracasa door di no actua contra e crimennan cometi pa e gobierno di Benjamin Netanyahu na Gaza.

Corte Penal Internacional a emiti un orden di aresto contra Netanyahu riba sospecho di crimennan di guerra na Gaza, incluyendo atakenan dirigi riba ciudadanonan y

usando hamber como strategia di guerra. Israel ta nenga e acusacionnan aki, y EU pa gran parti a bin ta haci negoshi manera custumber cu e pais.

Riba 7 di october 2023, Hamas a comete un atake terrorista riba Israel, matando por lo menos 1.139 hende. Israel a responde cu bombardeonan masivo riba e Franha di Gaza y, cu excepcion di un alto al fuego cortico na comienso di e aña aki cu Israel a kibra dia 18 di maart, a sigui desde e tempo ey.

Te cu 13 di juli 2025, Israel a mata por lo menos 58.026 hende den e Franha di Gaza, incluyendo 17.400 mucha, Al Jazeera a informa a base di cifranan di e ministerio di Salud Palestino. Por lo menos 138.520 hende ta herida.